

- राईजिंग राजस्थान ग्लोबल इनवेस्टमेंट समिट काले सूँ जयपुर मांय-प्रधानमंत्री नरेन्द्र मोदी उद्घाटन करेला।
- निवेश सम्मेलन मांय 32 देशां रे कारोबारी जगत री हस्तियां साथै 5 हजार प्रतिनिधि भाग लेवेला।
- गृहमंत्री अभित शाह सीमा सुरक्षा बल री सराहवना करी-जोधपुर मांय बीएसएफ रे थापना दिवस जळसां मांय सिरकत करी।
- उपराष्ट्रीय पल्स पोलियो अभियान री आज सूँ सरुआत व्ही-आगला दो दिनां घर-घर जा र पोलियो री खुराक पिलाई जावेली।

000

तीन दिवसीय राईजिंग राजस्थान ग्लोबल इनवेस्टमेंट समिट री सरुआत काले सूँ जयपुर रा सीतापुरा स्थित जेईसीसी मांय व्हेला। प्रधानमंत्री मुख्य अतिथि रे तौर माथे सिरकत करेला। उद्घाटन सत्र मांय सम्बोधन करणे रे साथे प्रधानमंत्री राजस्थान ग्लोबल बिजनेस एक्सपो रो भी शुभारंभ करेला। मुख्यमंत्री भजन लाल शर्मा जळसा मांय कर्या जा रह्या विकास कार्या अर राजस्थान री अर्थव्यवस्था ने पांच बरसा मांय दुगणो कर साढे तीन सौ बिलियन डॉलर ताई पहुँचाणे रो लगस राखेला। उद्घाटन सत्र मांय कुमार, मंगलम, बिड़ला, अनिल अग्रवाल, गौतम अड़ानी अर आनन्द महिन्द्रा साथै केई दूजा उद्योगपति भेळा होणे जा रीया है। इण रे साथै ई केई देशां रा व्यापारिक समूहां रा मोटा अहलकार अर राजनयिक भी समिट मांय हिस्सो लेवेला। इण सम्मेलन मांय 32 देशां रा प्रतिनिधि हिस्सो ले रह्या है। इण मांय 17 देशां री भागीदारी पार्टनर कन्ट्रीज रे रूप मांय होणे जा री है। म्हाणा खबरनवीस बतायो निवेशकां रा इण कुम्भ मांय करीब पांच हजार प्रतिनिधि हिस्सो लेवेला। समिट मांय 12 खेतरां खातिर थीमेटिक सत्र व्हेला जिण मांय देश दुनिया रा विशेषज्ञ, उद्योग जगत रा शीर्ष प्रतिनिधि, केन्द्र अर राज्य सरकार रा अहलकार भाग लेवेला। सम्मेलन रे दूजे दिन प्रवासी राजस्थानी कॉनक्लेव राख्यो ग्यो है। इण रे माध्यम सूँ दुनियाभर मांय फैले प्रवासी राजस्थानियां ने एक मंच माथे लाणे रो जतन कर्यो जा रियो है। तिसरे दिन एमएसएमई कॉनक्लेव राख्यो ग्यो है जिण मांय पैनल डिस्कशन व्हेला। वठिने हितधारकां ने नेटवर्किंग रो मौको भी दियो जावेला। इण तीन दिवसीय निवेशक सम्मेलन रे चालता प्रतिभागी देशां अर राजस्थान रे बीच सहयोग अर साझेदारी ने बधावो देणे खातिर कन्ट्री सेशन अर राउण्ड टेबल रो भी आयोजन कर्यो जा रह्यो है। ध्यानजोग है कि समिति सूँ पेल्यां तीस लाख करोड़ रिप्यां रे निवेश प्रस्तावां खातिर एम.ओ.यू. कर्या जा चुक्या है। समिट रो खास आकर्षण राजस्थान ग्लोबल बिजनेस एक्सपो भी है। इण मांय कन्ट्री अर राजस्थान और स्टार्टअप पेवेलियन बणाया गया है अर व्यापार समूहां री कानी सूँ प्रदर्शनी लगायी ज्यी है। इण महा-आयोजन ने देखता व्हा राजधानी जयपुर मांय सुरक्षा रा तगड़ा बन्दोबस्त कर्या गया है। अतिरिक्त पुलिस कमिश्नर डॉ. रामेश्वर सिंह बतायो के चार हजार सूँ बत्ती पुलिसकर्मी सुरक्षा रो मोर्चा संभाळेला।

-----

समिट मांय भागीदारी खातिर पावणां रो जयपुर पहुँचणो आज सूँ सरु व्हे ग्यो है। राजधानी जयपुर री खास ईमारता अर चौराहां ने सोणा रूप सूँ सजायो ग्यो है। पावणा री अगुवाणी खातिर न्यारी-न्यारी जगावां माथे सांस्कृतिक प्रस्तुतियां भी व्हेला।

000

लोकसभा अध्यक्ष ओम बिरला आज जयपुर मांय राजस्थान पेंशनर्स समाज रा वार्षिक अधिवेशन मांय सिकरत करी। इण मौके माथे श्री बिरला कह्यो के पेंशनर्स आप रे कड़ी मेहनत अर सेवा सूं प्रदेश रे नुवे निर्माण मांय अहम भागीदारी निभाई है।

-----

अधिवेशन मांय हिस्सो लेणे रे पाछे श्री बिरला भीलवाड़ा रा आसीन्द खेतर रा मालासेरी डूंगरी खातिर रवाना व्हा। भगवान देवनारायण री जन्म स्थली मालासेरी मांय आज सूं महाभक्ति महोत्सव रो आगाज व्हा दो दिन रा इण जळसा मांय महाआरती, परिक्रमा अर ड्रोन शो साथे केई आयोजन व्हेला।

000

केन्द्रीय कानून मंत्री आज जयपुर पहुंचयां। वणा यूथ हॉस्टल मांय डॉ. भीमराव अम्बेडकर री पुण्यतिथि रे मौके राखी ज्यी प्रार्थना सभा मांय हिस्सो लियो। कार्यक्रम मांय यू.डी.एच.मंत्री झाबर सिंह खर्रा अर विधायक गोपाल शर्मा भी भेळा व्हा।

000

राज्य विधानसभा रा मुख्य सचेतक जोगेश्वर गर्ग जालौर मांय चाल रह्या किसान आन्दोलन अर जवाई नदी ने पुर्नजीवन ने ले र गृह मंत्री अमित शाह ने मांग पानो सौप्यो है। श्री गर्ग बतायो की जालौर अर आसे पासे रा खेतर पाणी रे कमी री कारणे डार्क जोन बण चुक्यो है। वणा जवाई बांध पुर्नभरण योजना रा लाभान्वितां मांय जालौर जिला ने भी जोड़ने री मांग करी है। मुख्य सचेतक बतायो के जवाई नदी में पुर्नजीवित करणे री मांग ने ले र किसान घरणे माथे बैठ्या है।

वां री मांग माथे बेगो ही विचार होणे चाहिजे। श्री गर्ग गृहमंत्री सूं इण बारा मांय समुचित कार्यवाही खातिर अरज कर्यो।

000

गृह मंत्री अमित शाह कह्यो है के सीमा सुरक्षा बल 6 दशकां सूं देश की सीमावां ने सुरक्षित रखणे रो काम बखूबी कर रह्यो है। आज जोधपुर मांय सीमा सुरक्षा बल रे 60 वें थापना दिवस रे मौके मांय राखी ज्यी जळसा मांय बोलता थकां श्री शाह कह्यो के बीएसएफ 1965 सूं ले र अबै ताई पूर्वी अर पश्चिमी सीमावां ने सुरक्षित रखणे रो काम कर्यो है। गृह मंत्री कह्यो के देश री बघती व्ही सुरक्षा जरूरतां ने बीएसएफ रे बिना पूरो कर्यो जाणो संभव नी है। इणी कारणे 25 बटालियन सूं शुरू व्ही बी.एस.एफ. रो लगोतार विस्तार हो रह्यो है। वणा कह्यो के बीएसएफ सीमा री सुरक्षा रे साथै-साथै घुसपैठ अर जाली नोटां ने रोकने समेत न्यारा-न्यारा मोर्चो माथे काम कर्यो है।

-----

गृह मंत्री कह्यो के कई बरसा ताई आपणे देश री सीमा सुरक्षा री आपणी निजी धुंधली री है पण केंद्र री मोदी सरकार इण माथे गंभीरता सूं काम कर्यो है। प्रधानमंत्री नरेंद्र मोदी रे नेतृत्व मांय देश रे सुरक्षा परिदृश्य मांय बड़ो बदलाव आयो है। गृह मंत्री कह्यो के भारत सरकार सीमा माथे इन्फ्रास्कचर ने मजबूत करणे माथे खास ध्यान दियो है अर इण रे खातिर हर बरस बजट मांय खास प्रावधान कर्यो है। श्री शहा कह्यो की सरकार सीमा माथे बसयोड़ा गांवां खातिर वाइब्रेंट विलेज योजना सरू करी है ताकि सीमावर्ती गांवां रे नागरिकां ने सम्मान, रोजगार अर सगळी मूलभूत सुविधाएं मिल सके। लगे टके 3 हजार गांवां मांय ओ कार्यक्रम प्रायोगिक तौर माथे सरू कर्यो ग्यो है। वणा कह्यो की सरकार अर्दसैनिक बळां ने मूलभूत सुविधावां मुहैया कराने अर वाणी समस्यावां ने दूर करणे खातिर लगोतार कदम

उठाया है। इण सू पैल्या, गृहमंत्री परेड रो जायजो कर्यो। श्री शाह जवानां ने वाणी चौखी सेवा खातिर वीरता पुरस्कार, पुलिस सेवा पदक अर ट्रॉफियां भी प्रदान कर सम्मानित कर्यो। गृहमंत्री जोधपुर मांय सरदार बल्लभ भाई पटेल री मूर्ति रो अनावरण भी कर्यो इण मौके माथे वणा कह्यो के देश ने एकजुट करणे मांय सरदार पटेल रे योगदान ने भुलायो नी जा सके है।

-----

जळसा मांय केन्द्रीय पर्यटन अर संस्कृति मंत्री गजेन्द्र सिंह शेखावत भी भेळा व्ह्या।

0000

राजसमंद मांय आज एक स्कूली बस पलटणे सू 3 टाबरां री मौत व्हे गयी अर 17 दूजा घायल व्हे ग्या। आ बस राछेटी गांव रे महात्मा गांधी इंग्लिश मीडियम स्कूल री ही और पिकनिक खातिर रवाना व्ही ही। देसूरी की नाल मांय पंजाब मोड़ रे कर्ने बेकाबू हो र पलटणे सू बस मांय सवार तीन टाबरां री मौके माथे ही मौत व्हे गयी। बठिने घायलां रो आर.के सफाखाना मांय ईलाज जारी है। दुर्घटना रे पाछे जिला कलेक्टर बालमुकुंद असावा अर पुलिस अधीक्षक मनीष त्रिपाठी साथै दूजा अहलकार मौके माथे पहुंचया बणा स्थिति रो जायजो लियो अर सफाखाना पहुंच र घायलां सू मुलाकात करी। राज्यपाल हरिभाऊ बागडे अर मुख्यमंत्री भजन लाल शर्मा हादसे माथे गहरो दुख जतायो। वणा ईश्वर सू मरण वाळां री पुण्या आत्मा री शांति अर शोक संतप्त पिरवारजणा ने दुःख सहन करणे री शक्ति देणे री प्रार्थना करी है। लोकसभा अध्यक्ष ओम बिरला भी हादसे माथे गहरो दुख जतायो है।

000

प्रदेश रा जिला मांय आज उपराष्ट्रीय पल्स पोलियो अभियान री सरुआत व्ही। राज्य स्तरीय अभियान री सरुआत चिकित्सा अर स्वास्थ्य मेहकमां री प्रमुख शासन सचिव गायत्री राठौड़ करी वणा जयपुर रा गांधी नगर मांय शहरी आयुष्मान आरोग्य मंदिर मांय टाबरां ने पोलियो री दवा पिला र अभियान रो आगज रो कर्यो। इण रे तैत करीब साढे 87 लाख टाबरां ने पोलियो की दवा पिलाणे रे लगस राख्यो ग्यो है। 47 हजार पोलियो बूथ रे माध्यम सू पांच बरस ताई रा टाबरा ने पोलियो खुराक दी जा रही है। अभियान रे तैत आवता दो दिनां ताई घर-घर जा र पोलियो री दवा पिलाई जावेली

000

वरिष्ठ नागरिक तीर्थ यात्रा योजना रे तैत आज अजमेर सू खास ट्रेन तिरुपति खातिर रवाना व्ही। देवस्थान महकमां री कानी सू इण रे जरिये 780 जात्रियां ने निशुल्क तीर्थ यात्रा करवाई जा री है।

प्रदेश मांय सर्दी रो असर तेज व्हे ग्यो है। उत्तरी राज्यां सू आ री ठण्डी हवावां प्रदेश मांय सर्दी बधा दी है। मौसम केन्द्र जयपुर सू मिली जाणकारी रे मुजब आज 16 सू बत्ती शहरां मांय कमती तापमान 10 डिग्री सेल्सियस सू नीचे दर्ज व्ह्यो। सब सू कम 7 दशमलव 1 डिग्री सेल्सियस तापमान सिरौही मांय दरज कर्यो ग्यो। आगला दो दिनां मांय तापमान मांय 2 सू 4 डिग्री सेल्सियस री गिरावट होवण री आस है। इण रे अलावा शेखावाटी खेतर मांय शीतलहर रो प्रकोप रहणे रा आसार है।

000